

**UITTREKSELS UIT DIE JONGSTE KERKORDE (2013) WAT
BETREKKING HET OP BEROEPSPROSEDURE EN BEVESTIGING
VAN NUWE LERAARS IN 'N GEMEENTE (Eie onderstreping en eie
beklemtoring)**

Artikel 8¹

- 8.1 'n Bedienaar van die Woord word vir diens aan 'n gemeente beroep deur die kerkraad van die gemeente, met approbasie deur die gemeente en **goedkeuring deur die ring.**
- 8.2 'n Bedienaar van die Woord word vir diens aan die kerkverband deur 'n kerkvergadering of sy gevolmagtigde benoem, met approbasie deur die kerkverband en goedkeuring deur die betrokke sinodale regs-/kerkordekommissie.
- 8.3 Die bevestiging van 'n bedienaar van die Woord vir diens aan 'n gemeente geskied **nadat goedkeuring daartoe verleen is deur die ring of sy gevolmagtigde.**
- 8.4 Die bevestiging van 'n bedienaar van die Woord vir diens aan die kerkverband geskied nadat goedkeuring daartoe verleen is deur die betrokke sinodale regs-/kerkordekommissie.
- 8.5 Die bevestiging van 'n proponent geskied met handoplegging.
- 8.6 'n Bedienaar van die Woord wat 'n beroep na 'n ander gemeente aangeneem het of 'n benoeming vir diens aan die kerkverband aanvaar het, ontvang 'n akte van demissie van die kerkvergadering in wie se diens gestaan is.
- 8.7 'n Bedienaar van die Woord wat emeriteer, ontvang 'n akte van emeritaat.

REGLEMENT 12

**REGLEMENT VIR BEROEPING, BEVESTIGING, DEMISSIE
EN EMERITAAT VAN BEDIENAARS VAN DIE WOORD**

1. ALGEMEEN

- 1.1 'n Bedienaar van die Woord word beroep vir diens aan die gemeente of benoem vir diens aan die kerkverband (vergelyk Artikel 8.1 en 8.2 van die *Kerkorde*).
- 1.2 'n Bedienaar van die Woord kan beroep, bevestig en uitgestuur word vir die gemeente se sending-/getuienisaksie of vir sending-/getuienisdiens saam met ander kerke of sendingorganisasies (vergelyk 2.5.1.2 en 2.8 van die *Reglement vir die Sending/Getuienis van die NG Kerk*).
- 1.3 Gelegitimeerdes van die ander lidkerke van die NG Kerkfamilie kan in die NG Kerk beroep en bevestig word, op voorwaarde dat
 - 1.3.1 die beroepene aan die vereistes van die NG Kerk vir opleiding en legitimasie voldoen (vergelyk *Funksionele Besluite: Beroepbaarheid van Bedienaars van die Woord binne die Familie van NG Kerke*), of

¹ Vergelyk *Reglement vir die Beroep, Bevestiging, Demissie en Emeritaat van Bedienaar van die Woord en Beleid, Funksionele Besluite en Riglyne*, punt 5

- 1.3.2 die Algemene Steunspan Predikantesake op aanbeveling van die ring goedgekeur het dat die beroepene met beperkte opdrag bevestig kan word (vergelyk *Funksionele Besluite*: Beroeping met Beperkte Opdrag).
- 1.4 Gelegitimeerdes van ander gereformeerde kerke met wie die NG Kerk in terme van 'n bilaterale ooreenkoms in volle verhouding staan, kan met inagneming van spesifieke vereistes wat die NG Kerk stel, in die NG Kerk beroep en bevestig word (vergelyk 4.3.1 en 4.7.1 van die *Reglement vir die Verhouding tot Ander Kerke en Groepe*).
- 1.5 Die bepalinge van hierdie *Reglement* is van toepassing by die beroeping, bevestiging, demissie en emeritaat van **bedienaars van die Woord in voltyds-onbepaalde**, tentmaker- en vaste termyn**poste**.

2. BEROEPING VIR DIENS AAN GEMEENTE

- 2.1 Die kerkraad van die gemeente beroep 'n bedenaar van die Woord vir diens aan die gemeente en kry daarvoor die **goedkeuring van die** lidmate van die gemeente en die **ring**.
- 2.2 **Voordat die beroepsbrief afgestuur word, moet**
- 2.2.1 die goedkeuring (approbasie) van die gemeente deur afkondiging verkry word; en
- 2.2.2 **die ring of sy gevolmagtigde kommissie skriftelik bevestig dat daar aan al die kerklike vereistes vir die uitbring van die beroep voldoen is.**
- 2.2.3 Besware teen 'n beroep of beroepene word by die betrokke ring of ringskommissie ingedien, wat dit volgens die bepalinge van die betrokke sinodale gebied hanteer (vergelyk ook 8. hieronder).
- 2.2.4 **Indien nie aan die vereistes voldoen is nie, word die beroep deur die ring of sy gevolmagtigde ongeldig verklaar.**

3. BENOEMING VIR DIENS AAN KERKVERBAND

- 3.1 Die ring, sinode of Algemene Sinode se gevolmagtigde benoem 'n bedenaar van die Woord vir diens aan die kerkverband en kry daarvoor die goedkeuring van die kerkverband.
- 3.2 Voordat die benoemingsbrief afgestuur word, moet
- 3.2.1 die goedkeuring (approbasie) van die kerkverband deur bekendmaking van die benoeming in die *Kerkbode* verkry word; en
- 3.2.2 die betrokke sinodale regs-/kerkordekommissie of sy gevolmagtigde skriftelik bevestig dat daar aan al die kerklike vereistes vir die benoeming voldoen is.
- 3.2.3 Besware teen 'n benoeming of benoemde word by die betrokke sinode of sy gevolmagtigde ingedien, wat dit volgens die bepalinge van die betrokke sinodale gebied hanteer.

4. PROSEDURE BY BEROEPING

- 4.1 Die kerkraad bepaal die posvereistes en kan die pos in die *Kerkbode* bekend stel.
- 4.2 **Die kerkraad stel 'n groslys op een of meer van die volgende wyse saam:**
- 4.2.1 **lede van die kerkraad kan tydens die beroepsvergadering name op die groslys plaas; en/of**

- 4.2.2 die ringskommissie en/of die Algemene Steunspan Predikantesake kan deur die kerkraad versoek word om vooraf name op die groslys te plaas; en/of
- 4.2.3 die lidmate van die gemeente kan versoek om by die skriba van die kerkraad name in te gee vir vooraf plasing op die groslys; en/of
- 4.2.4 die naam van die beroepende gemeente en die datum van die beroepsvergadering kan onder amptelike berigte in die Kerkbode geplaas word en gelegitimeerdes kan sodoende versoek word om hulle name tesame met 'n curriculum vitae aan die skriba van die kerkraad te stuur vir vooraf plasing op die groslys.
- 4.3 Die kerkraad van die beroepende gemeente kan aan gelegitimeerdes wie se name vooraf op die groslys geplaas is, 'n vraelys stuur waarin bedieningsgerigte vrae gestel word.
- 4.4 Die kerkraad kan 'n curriculum vitae aanvra van enige persoon wie se naam vooraf op die groslys geplaas is.
- 4.5 Vertroulikheid word gehandhaaf ten opsigte van die persoonlike inligting van diegene wie se name op die groslys geplaas is.
- 4.6 Indien die kerkraad van 'n pre-advieskommissie gebruik maak, word die name met die beskikbare inligting aan die kommissie voorgelê.
- 4.6.1 Die pre-advieskommissie bepaal aan die hand van die posvereistes wie die geskikte persone vir die pos is.
- 4.6.2 Die pre-advieskommissie lê die name van minstens drie geskikte persone in alfabetiese volgorde aan die kerkraad voor, tesame met al die ander name op die groslys.
- 4.6.3 Die pre-advieskommissie kan inligting oor persone wie se name op die groslys is, sonder beïnvloeding aan die kerkraad voorsien.
- 4.7 Op versoek van die kerkraad en met opgaaf van rede(s), kan die ring of sy gevolmagtigde goedkeuring verleen dat minder as drie (3) name op die groslys geplaas word.
- 4.8 Die beroeping vind op geslote stemwyse plaas en wel soos volg:
- 4.8.1 Die aanwesige kerkraadslede moet 'n kworum wees.
- 4.8.2 Elke lid van die vergadering moet stem.
- 4.8.3 Persone wat die vergadering in adviserende hoedanigheid bywoon (waaronder die verteenwoordiger van die ring en die lede van die pre-advieskommissie wat nie kerkraadslede is nie), kan aan die bespreking deelneem, maar mag nie stem nie.
- 4.8.4 Die persoon op wie die meeste stemme verenig word, is verkies indien die getal stemme op die persoon uitgebring die volstreekte meerderheid van die aanwesige stemgeregtigdes uitmaak.
- 4.8.5 Indien 'n persoon nie 'n volstreekte meerderheid van stemme kry nie, vind daar 'n verdere stemming plaas uit die name wat die hoogste getal stemme gekry het en saam 'n volstreekte meerderheid vorm.
- 4.8.6 Indien daar 'n staking van stemme is wat nie deur verdere stemming opgelos kan word nie, geskied die beslissing deur die lot.
- 4.9 In gevalle waar die benoeming deur die kerkverband geskied, sien die kerkvergadering toe dat aan die toepaslike vereistes van hierdie gedeelte van die Reglement voldoen word.

5. BEROEPSBRIEF

- 5.1 Die kerkraad stel die beroepsbrief op.
- 5.2 'n Verteenwoordiger van die ring, wat nie lidmaat van die betrokke gemeente is nie, adviseer die kerkraad in die opstel van die beroepsbrief.
- 5.3 In die geval van benoeming deur die kerkverband, word die advies deur die betrokke sinodale regs-/kerkordekommissie gegee.
- 5.4 Die beroepsbrief is die diensaanbod wat aan die hand van Artikel 9 van die *Kerkorde* die diensopdrag en in terme van Artikel 13 van die *Kerkorde* die diensvoordele van die beroepene omskryf.
- 5.5 In gevalle van benoeming deur die kerkverband, word die nodige aanpassings gemaak ten opsigte van die diensopdrag en diensvoordele.
- 5.6 Onderhandeling rakende beskikbaarheid vir die pos en enige diensvoorwaardes, kan slegs plaasvind nadat die beroep uitgebring is.

6. KENNISGEWING VAN BEROEP

- 6.1 Die voorsitter van die kerkraadsvergadering gee dadelik aan die gelegitimeerde wat beroep is, kennis van die beroep wat uitgebring is.
- 6.2 Die Kerkbode word onverwyld deur die skriba in kennis gestel van die uitbring van die beroep (later ook van die aanneming of bedanking daarvan).

7. GOEDKEURING VAN BEROEP

- 7.1 Waar 'n bedienaar van die Woord na 'n gemeente beroep word, word die naam van die beroepene op twee agtereenvolgende Sondae tydens die erediens aan die gemeente vir goedkeuring (approbasie) deur die gemeente bekendgemaak.
- 7.2 So gou doenlik na die laaste bekendmaking van die beroep en nadat die tyd vir besware verby is, lê die voorsitter van die kerkraad die betrokke stukke aan die skriba van die ring of sy gevolmagtigde voor.
- 7.3 Die ring of sy gevolmagtigde kontroleer of daar aan die volgende kerkordelike vereistes vir die uitbring van die beroep voldoen is:
 - 7.3.1 skriftelike bevestiging van die Algemene Steunspan Predikantesake dat die beroepene na 'n gemeente van die Kerk beroepbaar is;
 - 7.3.2 skriftelike bevestiging van die beroepene se huidige gemeente dat die persoon lidmaat is;
 - 7.3.3 skriftelike bevestiging van die verteenwoordiger van die ring tydens die beroepsvergadering dat die korrekte kerkordelike prosedures gevolg is met die uitbring van die beroep;
 - 7.3.4 die voltooide beroepsbrief behoorlik onderteken is deur die gevolmagtigdes van die kerkraad;
 - 7.3.5 skriftelike bevestiging van die huidige ring onder wie se opsig die beroepene staan, dat daar geen tug en/of dissiplinêre ondersoek teen die beroepene hangende is nie en/of dat die persoon beroepbaar is; en
 - 7.3.6 bevestiging deur die beroepende vergadering dat geen wettige beswaar teen die beroep uitgebring is nie.
- 7.4 Waar 'n benoeming deur die kerkverband gemaak word (vergelyk Artikel 8.2 van die *Kerkorde*), verkry die vergadering wat die benoeming maak die goedkeuring van die

kerkverband deur bekendmaking van die benoeming in die *Kerkbode* en word die stukke genoem in 7.3.1 tot 7.3.6 hierbo aan die sinodale regs-/kerkordekommissie voorgelê vir goedkeuring.

- 7.5 Indien nie aan die vereistes voldoen is nie, word die beroep deur die ring of sy gevolmagtigde, of die benoeming deur die sinodale regs-/kerkordekommissie, ongeldig verklaar.
- 7.6 Sodra die beroep deur die ring of sy gevolmagtigde of die benoeming deur die sinodale regs-/kerkordekommissie goedgekeur is, word die beroepsbrief of benoemingsbrief aan die beroepene of benoemde gestuur vir oorweging van die beroep of benoeming.
- 7.7 Die beroepene het na ontvangs van die beroepsbrief 'n maksimum van veertien (14) dae om die beroep te aanvaar of te bedank, tensy uitstel daartoe deur die kerkraad verleen word.

8. BESWARE TEEN BEROEP

- 8.1 Enige ongesensureerde belydende lidmaat van die beroepende gemeente, het die reg om tot 24 uur na die tweede afkondiging van die beroep, skriftelike beswaar met opgawe van rede(s) by die kerkraad in te dien.
- 8.2 Besware mag slegs gegrond wees op bepaalde klagtes teen die leer of lewe van die beroepene, of op grond van klagtes insake onreëlmatigheid in verband met die uitbring van die beroep.
- 8.3 Besware teen die beroep ingebring, word soos volg hanteer:
- 8.3.1 Die besware word by die skriba van die kerkraad ingedien, wat die voorsitter versoek om spoedeisend die kerkraad byeen te roep om die besware in behandeling te neem.
- 8.3.2 Indien die besware handel oor onreëlmatighede gedurende die beroepingsproses, verwys die kerkraad dit na die ring of sy gevolmagtigde vir beslissing.
- 8.3.3 Indien die besware handel oor die leer of lewe van die beroepene, doen die kerkraad navraag daarvoor by die ring onder wie se opsig die beroepene staan.
- 8.3.4 Indien die besware ongegrond is, word voortgegaan met die beroep.
- 8.3.5 Indien dit blyk dat die besware gegrond is, word die beroep deur die ring of sy gevolmagtigde ongeldig verklaar.
- 8.3.6 Indien die ring die beroep ongeldig verklaar, gee die kerkraad aan die beroepene daarvan kennis met opgaaf van rede(s) en kan 'n ander beroep uitgebring word.

9. DIENSOOREENKOMS

- 9.1 Na oorweging van die bepalinge van die beroepsbrief en enige onderhandelinge daaromtrent, word die diensooreenkoms waarvolgens die bedienaar van die Woord in diens van die gemeente of die kerkverband gaan tree, finaal opgestel.
- 9.2 Die diensooreenkoms bevat inhoudelik die volgende:
- 9.2.1 Identifikasie van die partye.
- 9.2.2 Aanhef.
- 9.2.3 Diensoms krywing: Algemene diensverpligtinge (vergelyk Artikel 9 van die *Kerkorde*) met gepaardgaande spesifieke verwagtinge.
- 9.2.4 Vergoeding en byvoordele (vergelyk Artikel 13 van die *Kerkorde*).

9.2.5 Die wedersydse erkenning deur die partye dat hulle geskrewe ooreenkoms onderhewig is aan die bepalinge van die *Kerkorde* en die besluite van die Algemene Sinode en die betrokke sinode soos van tyd tot tyd gewysig.

9.2.6 Aanvangsdatum:

9.2.6.1 In die geval van bedienaars van die Woord in diens van gemeentes of in diens van die kerkverband, die datum van demissie uit die vorige gemeente of werkkring.

9.2.6.2 In ander gevalle waar 'n beroep aanvaar is, is die aanvangsdatum die datum van bevestiging of 'n datum van indienstreding soos ooreengekom.

9.2.7 'n Verklaring deur die beroepene dat daar geen hangende of dreigende tughandeling teen die persoon is nie en dat persoon aan die *Plegtige Legitimasieverklaring* getrou sal bly.

9.2.8 Die partye se handtekeninge met getuies en datum van ondertekening as aanvaarding dat 'n diensooreenkoms tussen die partye tot stand kom.

9.3 Die finale diensooreenkoms van 'n bedienaar van die Woord in diens van 'n gemeente word deur die ring of sy gevolmagtigde en in geval van 'n bedienaar van die Woord in diens van die kerkverband deur die betrokke sinodale regs-/kerkordekommissie goedgekeur. Hierna word die finale ooreenkoms deur beide partye onderteken en kan die bevestiging plaasvind met inagneming van die ander vereistes vir bevestiging.

9.4 Hierdie diensooreenkoms kan van tyd tot tyd gewysig word met instemming van beide partye en skriftelike goedkeuring van die ring of sy gevolmagtigde in die geval van 'n bedienaar van die Woord in diens van 'n gemeente, of die betrokke sinodale regs-/kerkordekommissie in die geval van 'n bedienaar van die Woord in diens van die kerkverband.

10. BEVESTIGING

10.1 Die bevestiging van 'n bedienaar van die Woord vir diens aan 'n gemeente geskied nadat:

10.1.1 die beroepende kerkraad die volgende stukke by die ring of sy gevolmagtigde ingedien het:

10.1.1.1 'n afskrif van die getekende dienskontrak;

10.1.1.2 'n afskrif van die beroepene se *Akte van Demissie* uit die vorige werkkring óf 'n getuigskrif van eervolle ontslag in die geval van diens aan 'n instansie buite die kerkverband óf die *Akte van Legitimasie* in die geval van 'n proponent wat beroep is;

10.1.1.3 'n afskrif van die beroepene se attestaat van die vorige gemeente wat by die beroepende gemeente ingedien is; en

10.1.1.4 'n skriftelike bevestiging van die pensioenkantoor dat die beroepene se pensioen in orde is.

10.1.2 die ring of sy gevolmagtigde kommissie skriftelik bevestig het dat aan die kerkordelik vereistes (vergelyk 10.1.1 hierbo) voldoen is.

10.2 Die bevestiging van 'n bedienaar van die Woord in diens aan die kerkverband geskied nadat:

10.2.1 die kerkvergadering wat die benoeming gemaak het of sy gevolmagtigde die volgende stukke by die betrokke sinodale regs-/kerkordekommissie ingedien het:

10.2.1.1 'n afskrif van die getekende dienskontrak;

10.2.1.2 'n afskrif van die benoemde se *Akte van Demissie* uit die vorige werkkring óf 'n getuigskrif van eervolle ontslag in die geval van diens aan 'n instansie buite die kerkverband óf die *Akte van Legitimasie* in die geval van 'n proponent wat beroep is;

- 10.2.1.3 'n afskrif, indien van toepassing, van die benoemde se atestaat, uitgereik deur die vorige gemeente en ingedien by 'n (ander) gemeente van die NG Kerk; en
- 10.2.1.4 'n skriftelike bewys van die pensioenkantoor dat die benoemde se pensioen in orde is.
- 10.2.2 die betrokke sinodale regs-/kerkordekommis­sie skriftelik bevestig het dat aan die kerkordelike vereistes (vergelyk 10.2.1 hierbo) voldoen is.
- 10.3 Die skriba van die beroepende vergadering of die kerkvergadering wat die benoeming gemaak het, rig 'n uitnodiging aan al die bedienaars van die Woord in diens van die ringsgemeentes óf in diens van die breër kerkverband om die bevestiging by te woon.
- 10.4 Die bevestiging in 'n gemeente geskied deur 'n bedienaar van Woord in diens van die gemeente óf die konsulent of 'n ander bedienaar van die Woord met bevoegdheid in die NG Kerk deur die konsulent daartoe versoek.
- 10.5 Die bevestiging in die kerkverband geskied deur 'n bedienaar van die Woord met bevoegdheid in die NG Kerk deur die betrokke kerkvergadering of sy gevolmagtigde daartoe aangewys.
- 10.6 Die bevestiging van 'n proponent geskied met oplegging van hande waarmee die bevoegdheid van bedienaar van die Woord verkry word.
- 10.7 Die bevestiging vind so spoedig moontlik plaas nadat aan die kerkordelike vereistes voldoen is.
- 10.8 Die kerkraad of ander kerkvergadering stel die betrokke ring, die sinodale kantoor, die Algemene Steunspan Predikantesake en die Kerkbode onverwyld in kennis van die bevestiging, met vermelding van:
- 10.8.1 die basiese biografiese besonderhede van die persoon wat bevestig is;
- 10.8.2 die vorige gemeente/werkkring;
- 10.8.3 die datum waarop die bevestiging plaasgevind het;
- 10.8.4 die gemeente waarin die persoon bevestig is;
- 10.8.5 die naam van die persoon wat die bevestiging waargeneem het;
- 10.8.6 die moontlike verandering in bevoegdheid wat plaasgevind het.
- 10.9 In die geval van 'n proponent of 'n bevoegde bedienaar uit 'n ander gereformeerde kerk wat bevestig is, word:
- 10.9.1 die betrokke sinodale kantoor versoek om aansoek te doen om die aanstelling as huweliksbevestiger; en
- 10.9.2 die aktuaris van die sinode versoek om 'n Akte van Bevestiging uit te reik.

REGLEMENT 13

REGLEMENT VIR VOLTYDS-ONBEPAAALDE POSTE

1. AARD

- 1.1 'n Voltyds-onbepaalde pos vir 'n bedienaar van die Woord is 'n voltydse pos met 'n onbepaalde termyn.
- 1.2 'n Bedienaar van die Woord in 'n voltyds-onbepaalde pos:
- 1.2.1 verrig die ampspligte van Artikel 9 van die Kerkorde in 'n gemeente soos in die diensooreenkoms vervat;
- 1.2.2 verrig die pligte in die kerkverband soos in die diensooreenkoms vervat;

- 1.2.3 ontvang volle lewensonderhoud van die gemeente of die kerkverband;
- 1.2.4 mag nie buite die kerkverband deelydse diens aan 'n ander werkgewer lewer nie.

2. SKEP VAN POS

- 2.1 Vanaf die stigting tot die ontbinding van 'n gemeente beskik die gemeente oor 'n pos vir bedienaar van die Woord wat óf voltyds óf deelydse vir 'n onbepaalde óf bepaalde termyn gevul word.
- 2.2 Die vulling van die pos vir bedienaar van die Woord in die gemeente kan met die goedkeuring van die ring of sy gevolmagtigde vir 'n tyd opgeskort word, terwyl die kerkraad met die hulp van die ring of sy gevolmagtigde na ander wyses kyk waarop die gemeente bedien kan word (kombinerings, eenwording of samesmelting).
- 2.3 Die beroeping van 'n bedienaar van die Woord vir die vulling van 'n voltyds-onbepaalde pos in die gemeente, kan alleen geskied nadat die kerkraad die ring of sy gevolmagtigde oortuig het van die finansiële volhoubaarheid van die pos en die ring of sy gevolmagtigde daartoe goedkeuring verleen het.
- 2.4 Die ring of sy gevolmagtigde se goedkeuring word ook verlang by die vulling van 'n voltyds-onbepaalde pos by meerdere bediening in die gemeente.
- 2.5 Die ring of sy gevolmagtigde adviseer die kerkraad met die opstel van die diensoreenkoms.
- 2.6 Vergoeding en ander diensvoordele vir 'n voltyds-onbepaalde pos is in ooreenstemming met die sinodale riglyne vir die vergoedingspakket vir bedienaars van die Woord, tensy anders ooreengekom.
- 2.7 'n Voltyds-onbepaalde pos is pensioendraend met die volgende vereistes:
 - 2.7.1 'n bedienaar van die Woord in voltyds-onbepaalde pos se pensioenbydraevlak word bereken volgens die ooreengekome bydraekategorie;
 - 2.7.2 die werkgewer bepaal die werkgewerbydrae tot die Pensioenfonds aan die hand van die reëls van die Pensioenfonds;
 - 2.7.3 die werkgewer se bydrae bepaal die ooreenstemmende bydraekategorie van die werknemer; en
 - 2.7.4 die minimum bydraekategorie is 100%.
- 2.8 Nadat die ring of sy gevolmagtigde die pos en die beroepsbrief goedgekeur het, kan die kerkraad oorgaan tot beroeping.
- 2.9 By die skep van 'n voltyds-onbepaalde pos in die kerkverband, sien die betrokke kerkvergadering toe dat aan die toepaslike vereistes van hierdie *Reglement* voldoen word.

3. BEROEPING EN BEVESTIGING

- 3.1 By die beroeping en bevestiging word uitvoering gegee aan die voorskrifte van Artikel 8 van die *Kerkorde* en die *Reglement vir die Beroep, Bevestiging, Demissie en Emeritaat vir Bedienaars van die Woord*.